



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 3

Sanjita Chanu nem kum 4
atema tenokdangba agutsu

Onok anema 'Baam' aser 'Ram'
longjemogo: Mamata Banerjee



VOL. XX NO. 173 (ADOK 173) DIMAPUR RASEMNÜ (WEDNESDAY) RONGCHII (APRIL) 05, 2023 ₹ 5.00

CM Rio-i G20 teshimtet nubotem mesur

Kohima, April 4, 2023 (TYO): Chief Minister Neiphiu Rio-i Mongulbarnü G20 nungi teshimtet nubotem dang Nagaland nung arua mapa inyaksü maongkatem metetdaksü.

Confederation of Indian Industries (CII) ajanga Capital Cultural Hall nung welcome dinner nung jembidang Rio-i "Nagaland nung infrastructure development maparen balaka mali saka tsingsang-mopung tajung aser süngdonglidong (80%) lir" ta ashi.

"Naga nunger nem alima tobur tajung moaja lir aser sobaliba takar lir. Naga nunger ya lisopurtem lir aser Bengal Eastern Frontier Regulation of 1873 ajanga British sorkar yimsüsüba mapang nungi kumzuka ayu. India sorkaria Constitution nung Arlla 371(A) ajanga Naga nunger kumzuka ayu

aser iba ajanga Naga nungeri sobaliba aser inyaksangshi takar kumzuka yuteter" ta CM Rio-i ashi.

Chief Minister Rio den Chief Secretary J. Alam aser Investment and Development Authority of Nagaland Chairman Abu Metha nungeri "Investment opportunities in Nagaland" ta ser kaketnu ka saya.

Iba sentong nung Task Force for Music and Arts (TaFMA)-i Naga nunger sobaliba tsingsang aser kentem ainertem dang sayua liasü.

Bodbar nü B20 indang "Conference on opportunities for multilateral business partnerships in Agriculture and Food Processing, Tourism and Information Technology" prime plenary session aser iba sentong nung Union Minister of State for External Affairs, Dr Rajkumar Ranjan Singh adentsü.

India sorkari Framework Agreement akhümtsübula

Dimapur, April 4, 2023 (TYO): April 5, 2023 nü Kohima nung G20 business meet nung adentsüpurtem arudang Naga Hoho (NH), Naga Mothers Association (NMA), Naga Students' Federation (NSF) aser Naga Peoples Movement for Human Rights (NPMHR) teloktemi international support meshiogo.

Mongulbarnü NSF aser Diphupar Naga Students' Union (DNSU) ajanga tezulubatem bener sentong agi. Parnokisa Dimapur airport junction aser Patkai bridge nung Naga nunger taginüba metetdakja banner ana ayu.

Maneni telok pezüi külem

sangdong ka ajanga India sorkar dang Framework Agreement nung nangzükba ama inyaksü aser Indo-Naga yimten ken o angatettepsü shiogo.

India aser Naga sorkar teshimtet nubotemi 1997 nung ceasefire agreement agi aser 2015 nung Framework Agreement sign sütep. Iba sülen kum ter jungdi ta aser saka India sorkari nangzükba ama meinyaker ta parnokisa ashi.

Naga aser India nunger yimjung nung liyonga aotsü asoshi tesentaktep tasen ka Naga nungeribo mulungogo. India sorkari mitkar tashi amshia inyaksangshiba anentsüla

kechiyong Indo-Naga yimtenren tebilemtsü ya mitkar ajanga masü saka yimten olemtep ajanga dang koktettsü ta telok pezüisa metetdaksü.

Taoba UN Secretary-General Boutros Boutros Ghali-i Naga nunger timtem agizükogo aser pai Nagaland nung human rights tensa ka lir ta shiogo.

"Ozü yimten, lokti, tamangba yimsü aser rongsenketzung kumzuka ayutsü atema India o Burma mitkartemi tashiyim agi onok azüoktsü merangba anema rarayonga arur. Ceasefire ana liaka iba rara ya manener" ta parnokisa metetdaksü.

(Maneni tapak 2 nung...)

Nisung ka kum 20 tepuokdak ayutsü obendang agutsü

Dimapur, Rongchii/April 04 (TYO): Zunheboto nung nisung kati par jala tanur (minor) ka dak tashiyim amshia shi nung medemba mechi kum 20 tepuokdak ayutsü (rigorous

imprisonment) aser senchi sen 10,000 achitsü Special Judge POCSO Act, Zunheboto, Ajongba Imchen ajanga April 4, 2023 nü obendang agüja liasü.

(Maneni tapak 2 nung...)

Kohima nung heroin seret 2.6 apu

Dimapur, April 4, 2023 (TYO): Kohima Police-i April 4, 2023 nü Khuzama Inter-State Check nung heroin seret 2.6 apu.

Police-i Imphal nungi Guwahati-i aoba Toyota Fortuner gari (registration number ML-11- 1111) soter mita

reprangdang heroin bena aliba apu, ta PRO DEF, Kohima-i metetdaksü.

Police-i gari lapoka reprangdang sapon pongdang 220 nung heroin seret 2.6 bena aliba angu aser iba indang jenjang ya Rs 3 crores shi asütsü ta

asadangtetogo.

Iba dak sendakba nung police-i nisung ana- Taj Uddin (23 yrs) aser Dhundreimayum Nawaz (25 yrs) apu aser Khuzama Police Station nung NDPS Act kübok ken o ka benokogo ta PRO-isa metetdaksü.

G20
भारत 2023 INDIA

UNITY
GOVERNMENT OF NAGALAND

B20 MEET AT STATE BANQUET HALL
9 AM ONWARDS

CULTURAL FEST & DINNER AT KISAMA
4 PM ONWARDS

FOCUS AREAS OF DISCUSSION

- AGRI & ALLIED SECTOR
- INFORMATION TECHNOLOGY
- FOOD PROCESSING
- TOURISM

Nagaland B20 BUSINESS MEET
5TH APRIL 2023
KOHIMA

Dept. of TE ajanga Advisor Temjenmenba agizükba sentong agi



Dept. of TE ajanga Advisor Temjenmenba agizükba sentong nung tangokba noksa angur.

Dimapur, Rongchii/April 04 (TYO): Department of Technical Education ajanga Advisor, Transport and Technical Education, Temjenmenba nem akum agüja tenüngsang agütsüba sentong ka Directorate Auditorium, Kohima nung April 3, 2023 nü ayongzüka liasü.

Iba sentong nung Advisor ajanga state nung Technical Education kota tongtipang, iba indang lemsatep aser diploma pass-out students nem employment agütsütsü maongka adokdaksüba nung tongti

shilem agiba indang ashi. Pai Department dang nukjidong tuluba nung takok angutsü asoshi sentong balala kanga junga asadanger yanglua mapa kuma inyaksü ajungshia liasü.

Paisa Department dang Research & Development, placement of students aser danga jurila tentet balala den lungjemer inyakba nung rangloksü nenshia ashi.

Iba sentong nung Director, Technical Education, Er. Vipulhou Lhoungu-i Department ajanga inyakba

maparen aser sentong balala indang lemsatepa liasü.

Iba sentong nung Commissioner & Secretary, Higher & Technical Education, Kenilo Apon, IAS menden liasü aser Additional Director, Tiakaba Amer-i melepzüng o jembia liasü.

Sentong nung Joint Secretary, Higher & Technical Education, Polytechnics Institute balala indang principal tem, aser Directorate of Technical Education nungi ketdangsur aser staff tem dena liasü.

C&S Kevileno Angami-i tesayurtem NEP yimya amshitsü ayongzü

Kohima, Rongchii/April 04 (TYO): Commissioner & Secretary for School Education & SCERT Nagaland, Kevileno Angami ajanga government school nung tesayurtem dang tensa-mapang melenshia aoba den lirumedema aser National Education Policy (NEP) 2020 amshia state nung shisalak yimyatem tejakleni bener aotsü ayongzüka liasü.

Kohima aser Tseminyu district kübok Heads of Government School atema anogo ka orientation sentong ayongzüka lapoktsüadang lai iba o ya jembia liasü.

National Education Police (NEP) 2020 indang jembiba mapang lai school education ecosystem nung temelenshi aser sayuba tsütsü temelenshi aser tanurtem yimya angateta shisadanger sayutsüba aser anitetsüba indang jembia liasü.

National Education Policy ya kaketshirtem tatidang mapang junga langzütetsüba indang kisüng masü saka parnokki par

puti otsü metettsüla aser zünger mapa inyaktetsüsa angazüker alitsü atema lir, ta lai ashi.

National Education Policy kübok tesayurtemi tanurtem anitetsüsa aser azüoktetsüsa metetjemer alitsüla, anungjidang parnokki lokti asoshi rongsen ka asütsü, ta lai ashi.

National Education Policy kübok state sorkari school tem nung ki o jen aser facility balala agütsütsüla aser tesayurtem agi anünga liaka yangji Heads of School shilem tulu lir, ta lai ashi.

Asen school temi junga inyaktetsü asoshi school head aser principal temi tongti shilem agitsüla aser school nung tensa balala azüoktsü asoshi ideas tasen amshitsüla, ta lai ashi.

"National Education Policy 2020 kübok school tem tejakleni bener aotsü asoshi mapang melenshiba den külemi asen sasa asena melenshitsü nüngdaker," ta Angami-i ashi.

DEO Kohima Emilo Patton ajanga iba sentong ayongzüka nukjidong lemsatepba mapang,

lokti nung temelenshi bener arutsü asoshi shisaliok ya hadir tem rongnung tongtipangtiba lir aser iba ya kaket nung zülua aliba kisüng masü saka skill sayuba nungi adoktsü, ta ashi.

Rokopheno Chase, GT, GHS Chandmari, Kedizelhou Rutsa, GT GHSS Sechü aser Albert Tsela, FT GMS Upper Tesophenyu nung temia pei tajangshibatem lemsatepa liasü.

Iba sentong ya District Education Office, SDEO & DMA Kohima ajanga ayongzü, kong Neivikhono menden liasü aser Pastor, Khedi Baptist Church Kohima village, Dr Ruokuovilie Sachü-i sentong tenzüka sarasadem aser DEO Kohima staff temi temeja ken ka aten.

Iba sentong nung shisalen sayur ya Deputy Director, Samagra Shiksha, Kelhikha Kenye; Deputy Director & Nodal Officer NEMIS, School Education, B. Nellayapan; Joint Director SCERT Vikedono Sesa aser NECTAR Team liasü.



Amenty Welfare and Educational Society Longjang ajang Longjang yimtiba nung March 31, 2023 nü "Educational Trust Award" sentong agidang Awardees den agiba noksa nung angur.

Bashangmongba Chang-i CWS mung dang moatsü

Dimapur, Rongchii/April 04 (TYO): Town Hall, Tuensang nung April 4, 2023 nü 60 buba Chang Wedoshi Setshang (CWS) General Conference alidang Minister, Housing & Mechanical Engineering, P. Beshangmongba Chang tongti tesemdanger ka ama dena liasü.

Iba sentong nung jembidang, Chang Wesoshi Setshang ajanga shisaliok tsütsü Chang kin atema shilem tulu agia 'Dolenweasen' amenoka makamaiter kaketshir nem senotsü teyari agütsüba aser Loyem Memorial Trophy ayongzüka district nung lanurtem nem saisapong tsütsü

maongka agütsüba asoshi Minister-i tenüngsang agüja liasü.

Naga nung zünger lanur aika tang tashi pei tsürabor dak metaloka lir, ta Chang-i ashi.

Paisa sentepa alirtem dang 'ism' aser nukmerem yimya indoktsü ajungshia aser itemji ajanga lokti nung telemsa adokdatsür, ta ashi.

Sentong nung CWS tir C. Pongsu-i tarur pela agizükba o jembia aser ADC Tuensang, Thungchanbemo Tungoe aser CKS tir Nusanglemba Chang nungeria o tatsütsü jembia liasü. Iba sentong nung menden GS CWS, Ebou Naset liasü.



Nagaland Governor La. Ganesan-i April 4, 2023 nü Nagaland state Museum semdanga liasü. Iba museum kanga junga anepaluba asoshi pai tenüngsang agütsü aser tesem ka nung Naga nung sobaliba ajanga angutsü asoshi ibai tesem tajung ka lir, ta pai ashi. Pai iba tesem semdangba mapang Raj Bhavan nungi ketdangsurtem aser Department of Art & Culture nungi ketdangsurtem, Commissioner & Secretary to Governor Wezope Kenye IAS aser Director, Art & Culture Adela Moa nungertem dena liasü.

Niuland nung DISHA senden amen

Dimapur, Rongchii/April 04 (TYO): District Development Co- ordination and Monitoring committee (DISHA) senden ka Deputy Commissioner, Niuland indang Conference Hall nung April 3, 2023 nü amendang MP (Lok Sabha), Tokheho Yephthomi-i ketdangsur dang mapang melenshia aoba den lirumedema aotsü ayongzüka liasü.

MP & Chairperson, DISHA ajanga ashiba agi, state tesem ajungalen Centrally Sponsored Schemes tem mapang tatakzük nung shidak inyakyonga aoba mita reprangtsü aser achayangtsü asoshi committee ya shimtet.

Iba sentong nung Food & Civil Supplies, Social Welfare, Agriculture, Horticulture, Medical, Education R&B, PHED,

RD aser Land Resources department temi 2018-2022 mapang central scheme balala inyakba indang osang agüja liasü. Committee züngsem temi district nung scheme balala mapa kuma inyakba aser inyaksü aliba indang jembia liasü.

Yephthomi-i department balala dang amalitep akatsü aser scheme mapa kuma inyaka ajangzüksü asoshi yimtsüng aser nüburttem jangjatetsü ajungshia aser ketdangsur dang terenlok yimdak-yimtsüng atongtsüsa angatetdaksütsü tuyua liasü.

MP-isa iba ama shisadokden senden ya küm nung pezüben amentsü aser district nung scheme balala inyakba indang osang tejangja agütsütsü metetdaksü. Iba senden nung menden Deputy Commissioner, Niuland, Sara S Jamir liasü.

Nisung ka küm 20 tepuokdak ayutsü... (TAPAK 1 NUNGI...)

Hokheshe Kiba-i par jala arishi küm 15 asüadang 2021-2022 küm mapang balala nung tashiyim amshia shi nung medemba ken o ka pa kinungtsü aser kinunger temi benoka liasü.

Obendang nung Special Judge POCSO Act ajanga state sorkar dang timtem ajurur alila nem u/s 357A of Cr.P.C and Rule 7 of the Protection of children from

sexual offence Rule, 2012 nung shia aliba ama sen lakh 8 agütsütsü ashi.

Iba sen ya DLSA, Zunheboto ajanga menoktsü aser sen ya tetsürla ajungtsü asoshi lar legal guardian temi amshitsü.

Iba obendang ya April 4, 2023 nü agütsü, ta Public Prosecutor, Zunheboto ajanga sangdong ka nung ashi.

India sorkari Framework ... (Tapak 1 nungi...)

"Naga nung ya yimjung meimertem lir aser yimjung nung liyonga onür. Külen, international community ajanga "Naga country" nung meimchir temeten anema inyakba nung tebang aittsüla aser Naga nung yimten, lokti, rongsenketzüng aser tamangba yimsü temetentem kümzüka

ayuba agizüksüla, kechiyong iba ya United Nations' declaration on the rights of indigenous people nung lateta lir" ta Naga Hoho, Naga Mothers' Association, Naga Students' Federation aser Naga Peoples Movement for Human Rights-i külem sangdong nungsa metetdaksüo.



Bhutan chuba Jigme Khesar Namgyel Wangchuck-i (teyong), New Delhi nung Mahatma Gandhi memorial, Rajghat nung aküm tetushi agütsüba noksa nung angur. Bhutan chuba anogo asem tang India semdangba mapag lir.

PM Modi aser Bhutan chuba na sensak asem

New Delhi, Rongchii/April 4 (Agencies): Ato Kilonser Narendra Modi aser Bhutan chuba Jigme Khesar Namgyel Wangchuck na Mongolbarnü sensaksemogo. Sensaksem mapang rongsenketzüng terenlok asoshi teka amteper inyaksüba densema tanga lenla aika nung sendaktepa inyaksangshitsü asoshi sensaksema liasü.

Bhutan chuba tang anogo ana atema India semdangba mapang lir. China-i Bhutan nung parnok inyakyim atsülangshitsü atema merandangba ajanga New Delhi tebilemsü akaba mapang tang chubai India semdang. Bhutan Ato Kilonser Lotay Tshering-i Doklam tri-junction indang jembiba dak sendakba nung aikati Himalayan tenemtsüng nung aliba linük ya Beijing den kanga junga sendaktepa akümer asütsü ta bilemer, ajisüaka Bhutan-i ashiba agi arrtsü dak sendakba nung parnok masetshi-i lir.

Bhutan chuba ya External Affairs Minister S Jaishankar-i Delhi airport nung agizüka liasü. Hombarnü nikongtsütsü Jaishankar-i chuba den ajuruteper aser Bhutan tarutsü atema chuba nükla aser India den tesendaktep akangshiba atema kanga pelar, ta ashi. Bhutan ya India atema kanga tongtibang linük ka lir aser linük ana tsüngda taoba küm ishika tsüngda defence aser security tesendaktep atsülangshio.

2017 küm Doklam tri-junction nung India aser China nunger sepaitem anogo 73 mangatettep adokba sülen Bhutan aser India na tesendaktep takangba aküm. Doklam plateau ya India atema kanga tongtibang tesem ka lir. Bhutan-i parnok meyong ta ashiba tesem ka nung China-i lenmang ulushitsü merangba sülen 2017 Doklam tri-junction nung mangatettep tenzüka liasü.

Iba lenmang yangluba ya India-i magizük, kechiyong iba ajanga security dak kongshitsü. India aser China na mangatettep ya sensaksem aiben akaba sülen benteta liasü. 2021 küm October ita Bhutan aser China nati arrtsü nung mangatettep aliba bentettsü atema tenangzüktepba ka yanglua liasü. Bhutan aser China na arrtsü km 400 dak tema lir aser arrtsü nung mangatettep aliba bentettsü atema linük ana tsüngda sensaksem 24 dak tema kaogo.

Tawa Bhutan PM-i, Doklam nung arrtsü ken o bentettsü atema China daka kasa temeden lir ta ashi. Bhutan atema India ya shishilembaba tsütsü partner tulutiba lir aser India-i Bhutan nung tangar dang nungi senotsü timba intoka arudar.

Drone PLI scheme kübok sorkari sen crore 30 shi lemshio

New Delhi, Rongchii/April 4 (Agencies): Drone manufacturer ka atema PLI ji total annual outlay shilem 25 asütsü aser iba ajanga component manufacturers 11 beneficiaries tem tali atema sorkari fiscal year (FY) 2022-23 nung Production Linked Incentive (PLI) Scheme kübok sen crore 30 shi agütsüogo, ta sorkar ketdangsur kati ashi.

Taoba küm July ita 6 nü PLI beneficiaries 23 indang provisional list ka sangdongba sülen tang iba jenjang agio.

"Iba scheme yagi kanga kara renloka oya aliba start-up aser small-scale entrepreneurs tem nem senotsü teyari tulu agütsütsü. Scheme kübok beneficiaries tem rongnung Throttle Aerospace system, IdeaForge, Absolute Composites Pvt. Ltd aser Aereo densema lir," ta aviation ministry nungi ketdangsur kati ashi.

Sorkar ketdangsur kati ashiba agi, PLI rate 20% lir, koba PLI schemes tem rongnung timtiba ka lir aser tanga sector nung rate kümshia ajemba ama masü drones nungbo küm asem tepeyong kasa dang asütsü. "Ministry of Micro, Small and Medium Enterprises (MSME) aser startups atema eligibility norm ya nominal levels nung lir aser scheme kübok drone dak sendakba software yanglurtem densema lir," ta ketdangsur ashiba den

manufacturer ka atema PLI ji total annual outlay shilem 25 asütsü aser iba ajanga beneficiaries tem tali atema sorkari fiscal year (FY) 2022-23 nung Production Linked Incentive (PLI) Scheme kübok sen crore 30 shi agütsüogo, ta sorkar ketdangsur kati ashi. Taoba küm July ita 6 nü PLI beneficiaries 23 indang provisional list ka sangdongba sülen tang iba jenjang agio. "Külem industry nung inyakerem PLI incentives anguba ngua kanga pelar. FY 21-22 atema incentive amount ya scheme sangdongba mapang crore 16 liasü. Sorkari indicative limit dang nungi timba agüja temsüa aliba manufacturer tem ajak nungdak peridaksüba ngua kanga pelar. Scheme tejakdangi aoba ngua kanga pelar aser sorkar dang Indian drone ecosystem takaraba renloka aotsü atema manufacturers tali anisemtsü asoshi scheme budget ajungkettsütsü mepeshir," ta "Drone Federation of India (DFI) tir Smit Shah-i ashi.

PLI scheme ya 2021 küm November 30 nü sangdong aser iba scheme yagi sorkar indang Atmanirbhar Bharat tashi itshidaksüba dang masü bendanglen nungi osettsü bener aruba tejamba kümdaktsür aser belener aoba timba kümdaktsür. Iba scheme benokba sülen 2023 küm tashi nungbo India ya drone hub ka kümdaktsütsü sorkar nükjidong lir. PLI scheme kübok küm asem (FY 2021-22 nungi tenzüka) atema total financial outlay ji sen crore 120 lir.



Deobarnü Hooghly district nung 'Ram Navami' procession mapang telok ana tsüngda mangatettep adokba sülen Rishra railway station anasa security personnel tem toktür aliba noksa nung angur.

Onok anema 'Baam' aser 'Ram' longjemogo: Mamata Banerjee

New Delhi, Rongchii/April 4 (Agencies): Tawa state nung mepetmesü adokba dak sendakba nung West Bengal chief minister Mamata Banerjee-i Mongolbarnü asendenshir Bharatiya Janata Party (BJP) anema jembio

gogo aser ashiba agi, saffron party-i lokti ka tangar lokti ka anema nokdakdakja Hindu tamangba yimsü tenüng menütsür. Azütokshia mangatettep adokba ya Bengal nunger sobaliba masü ta shia Banerjee-i, BJP puri state nung 'goonda' tem anisemogo, ta ashi. "Ni teti dang kümküma alitsü nungdaker kechiyong BJP puri mepetmesü adokdaktsütsü rongmesor. Bengal nung aliba nüburtemi azütokshi lendong maginer ta parnoki mangateter. Mepetmesü adokdaktsütsüba ya Bengal sobaliba masü. Onoki lokti nung azütokshia mepetmesü madokdaktsür aser nüburtemi rongmesor mepetmesü madokdaktsür. BJP puri parnok sasa minyaktetba sülen mepetmesü adokdaktsütsü atema nisungtem anisemer," ta CM-i Khejuri district nung rally ka nung o jembiba mapang ashi.

Laisa, "Ram Navami mapang lanurtem shirnok ket nung prangbong hadir bona aliba nguogo iba kasa ya CPI(M)-ia inyaka liasü. CPI(M) inyakyimtem tamadok. 'Baam' (Left) aser 'Ram' (BJP) na onok anema longjemogo," ta ashi. Union home minister Amit Shah-i Bihar nung mepetmesü adokba sülen mepetmesü adokdaktsürtem langkoshishi alena ayutsü ta ashiba indang benoka jembiba mapang Banerjee-i, "BJP-i Bihar nung parnoki sorokar kümtetra mepetmesü adokdaktsürtem langkoshishi alena ayutsü ta shio, süra kechiba parnoki idakibo parnok goonda tem dak aji minyaker," ta asüngdang.

Bengal nung taoba hopta ana tsüngda Ram Navami processions mapang Howrah aser Hooghly district nung mepetmesü adokog. Iba tatalokba dak sendakba nung TMC aser BJP na kati ka dak tai tongloksütepa arudar. Deobarnü BJP-i ashiba agi, West Bengal, Hooghly district kübok Rishra nung Ram Navami rally ayongzüka agiba mapang mosque ka kima rally nung shilem agirtem maka liasü aser local MLA ka yirutsü. Maneni Hokolbarnü Ram Navami procession ayongzüka agiba mapang telok ana tsüngda mangatettep adoka liasü. Osang ajanga ashiba agi, iba lendong nung gari kar rongtoktsü aser dokan aser auto-rickshaw kar raksaja liasü. Kasa mapang nung Howrah nung Ram Navami procession agiba mapang prangbong bener senzüba atema Mongolbarnü West Bengal police-i arishi küm 19 tain asangur chanu ka puogo. Aija alisang shiba video ka nung nguogo, pa ya Bihar kübok Munger district nung apu.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
JIOJEN AGIADOKBA NOTICE
Securitisation & reconstruction of Financial Assets and enforcement of security Interest (section) Act, 2002 aser Security Interest (Enforcement) Rule, 2002 kübok Section 13 (12), Rule 3 nung agüja aliba tashi nung ajemdaker tsünglanglen sign süa aliba State Bank of India Authorised officer-i 02.01.2023 anogo nung Demand Notice ka agüja sen apur Shri Chinny Magh aser Co-borrower Smt. Naomi Bukh na dang iba notice agütsüba anogo nungi tenzüka anogo 60 tsüngda notice nung shia aliba ama sentsüh Rs.37,79,905.00 (Rupees Thirty Seven Lacs Seventy Nine Thousand Nine Hundred Five only) aotsü tetuyuba agütsür.

Sen apuri senji magütsütet, anungji sen apur aser public dang, iba Act nung Section 13 kübok Sub-section (4) aser Security Interest (Enforcement) Rules, 2002, Rule 8 nung agüja aliba tashi amshia tsünglanglen sign süa aliri 2023 küm march ita 30 nü tsünglanglen shia aliba kiojen agiadokog, ta sangdonger. Talisa sen apur aser public dang iba kiojen dak sendakba kecha inyaksangshi masütsü tuyur, aser yamaji inyakra senji State Bank of India indang asütsü aser ibaji 03.01.2023 anogo tashi nung sentsüh Rs.37,79,905.00 den külemi sen tetemlok aser tanga charges densema agütsü.

Sen apur dang iba Act nung Section 13 kübok sub-section (8) nung ajemdaker mapang shidak nung item kiojen alangzütsü metetdaksür.

Ali kiojen terasa:
Burma Camp, Dimapur, Nagaland - 797112 nung Shri Chinny Magh tenüng nung Dag No.757, Patta No.577 agi ayimjema aliba ali tasazük 00B - 01K - 04L aser RCC building ajak.

Artsü:
North: Plot of Mr. Khalo, **South:** Patta land, **East:** Plot of Late Alo Kin, **West:** Approach Road / Plot of Tali Ao.

DATE : 30.03.2023 AUTHORIZED Officer
PLACE : Dimapur (State Bank of India, SARB Jorhat)



TIR YIMYIM

YIMOBILEM (EDITORIAL)

DIMAPUR RASEMNÜ, RONGCHII (APRIL) 05, 2023

Aener arupet arutsüla

Tang ya Nagaland yimtiba Kohima nung bendang lima 20 dak teimba nungi yimten lenirtem den rongsenren mapa nung mongin nisungtem aika arua lir. Itemji anogo anasemka Nagaland nung monga Naga nunger yimten lenirtem, industry kiburtem, aluyimertem aser business inyaktertem den Nagaland nunga parnok sen aser temetetba shisatsü amshia ajak kasasa ajangzüksüsa inyaksüba lenmangtem bushia sensaksem akatsü aser mulungtepra külemi inyaksüba mapatema karbo renema ayutsü. Atangji, Nagaland asoshi ibai mapang tajung ka lir, ajisüaka teratatsü kaji, Nagaland nung bendangertemi temulunglema inyaksüsa industry aser business kiburtemang majurutsüa akok aser aluyimertema malitsüang akok. Ano, government ajanga pi meyong senotsü tsütepa Nagaland nung terenlok mapa inyaksübajibo tarendaktsüka asütsü, kechiyong tagitarutsü agi kibur ketbo tesadanga matongtsü. Ajisüaka, tangar bendang semer nungi lenirtem arua asenok ajurua amongbaji asenok atema tajangzük aika lir aser item tajangzüktem rongnung mezüngbubaji asen limai aener arutsüba tenüng nung kima yimdong aser kiojen merükteta renemba ya asütsü. Aji oda, ainer aru meteteteta Dimapur tayimtsü anendak nungi Kohima tashi lenmang aser yimitem kanga topur junga yanglushia lir. Atangji, Kohima-bo asenok ajak atema yimtiba asünungji bendanglen nungi tongtibang nisungtem arupet arur, aser yimya asünungji tongtibang nisung aru shia yimti yimdong aser kiojen yanglushipet yanglushir. Ibaji kodang bilemdangdir, bendanglen nungi tongtibang nisungtem aruba ya Kohimai dang masü saka Nagaland nung district shiai melentepa arudaktsünütsüka bilemer, kechiyong 'aener atemer shi den chiyong ama' aener aruba tenüng nung Kohima amaji district headquarters ajak mapang mapang shia topur junga yanglushia aotsü. Atangji, takar aser tashitemetet lima nungi lenirtem aruba agi asenok yimti yimdong aser kiojen merüka topur jung yanglushiba tajangzükji dang masü saka parnoki jembiba nungia asenok shisa tasen aika angazüksü. Shidi asünungbo, temetetertem dang nungi shisalen tasen angubajiang asenok asoshi ajiang tajangzük tuluba lir. Aji oda, asen limai aener aruba ajanga tangsa tang tejang tanga ongzüka mechitetka, tanemi tanemibo asenoka parnok jilu tajung ajizüker küma asenoka asenoksasa merükmejua alitsübo meteta akümtsü imlar. Ashi tang tangbo, asenok ya alemli hapta piyong tzü mechigu kazür amongnü-ang chigu ama, aener marura asenokibo lenmang junga meyangluyonga kecha balaka mebiler, kima yimdong maokyonga ojang, office kima aser kilong sali metsü agi sünga metsüa aliyonga asenok dangbo ajiang telemsaba amai bilema asenok alir. Aji oda, Nagaland yagi küm junga bendanglen nungi tongtibang aener kata maru nungbo asen lima ya Kohima dena auyi agi pongbanger aser lishi agi tepbanger mereprangtet küma aotsü. Tang G20 senden mapang yaa parnok rongnung karbo Dimapur yimti yimdong ajangtsüsa sentong kar yanglu nungbo Dimapur yimti yimdonga aritepa khen atema asüyonga terabo topur junga yanglushir lila, saka Dimapur lenibo shinga marurji Dimapur-bo kibur maliba yimti amato kümdagi. Atangji, Dimapur tayimtsü anendakjia aenertemji orrbo naro tsüki agi azümunng dang akümtsü aser metsümeshidaka anguoka ai majung akümtsü. Asenok tangatetba aser jakla reprangdangra, tang aener agizüksü renemba mapattem nungjia asen lima topur junga yanglunüba shisatsü masü saka tangar dang khen atema asen lima topur junga sayunüba jakla dang angur. Iba ama jaklajibo asenoksasa asenok külaoktsüba mapa ka dang asütsü. Joko, asenoka aener arudang dang merüksüba masü saka aener maruyonga asen meyong asen lima yabo temeim agi teti merüka aser topur junga ayutsüla. Iba atemajibo government nung inyaktertemi nendaka inyaksüla aser nübertemia pei alidak pei kima aser pei yimti yimdongbo pei ki aser kima den kasasa bilema anepalutsüla.

OLEMSABANG

GOOD FRIDAY

~ C. Walu

Tsüngrem chir Yisu Khrista kangki nung angenlokba anogo nung tatalokba otsü tatsüka Olemsabang nung lemsateper. Iba otsü ya laishir kari züluba nungi tanü asen putu den medemdanga azüngtsü, aser tangazüksü aketba otsü ka ta bilema nibo temoatsü ngua züngogo. Anungji nenoka kar danga temoatsü ngua züngra Tsüngrem nem tenüngsang agüjangma. Good Friday indang mapang balala nung sayutsüngirtemi rajema ashiba asenok ajaki tongmelang agi angateta alinung, iba indang idaki mezülur. Saka otsü dang jagi dang indangindang odi.

Nia Yihuda nunger tezü asünung, Yihuda lima nungi talangka pilar liaka, A.D. 33 meta ka Yihuda nunger Kümtettsü Benjong nung adentsü atema ni Yirusalem yimtiba bushia apuso. Niji shibar ibaji tama nenok dang shidi: Tenyartem Mapa tapu 13. 1 nung "Niger" ta shia aliba ya ni aliba yimti tenüng lir. Kasa lai nungjisa nenoki Lukia ta shia alibaji künaprongla telidak yim Kurini yim tenüngji lir. Kübujibo Ibri nunger liasü. Pa Palestine lima liasü, saka rishikangshiba agi idakji melitet South Africa lima arua ali. Anungji kü sentsüji tanak dang masü asoa tulu aser talang. Niger ya South Africa nung Libya den northeast, Chad to the east, Nigeria tsütsü south, Benin and Burkina Faso den southeast, Mali tsütsü west aser Algeria tsütsü northwest ta aliba linük ka lir.

Tamalen shisem ama, "Ni Kurini nunger Simon, kübutsü Sarah, aser ozü chir ana - ka Rufo aser ka Alexander. Ozü kibong South Africa lima Kurini yimti nung liaka ozü Yihuda nunger yimsüyimbongtemji teti metsüngareta amshiba kibong ka lir. Aser ano sobaliba tarensenbo ni kodanga meintok aser mamatok. Anungji yimsü amato ni kenü Yirusalem yimtii Kümtettsü Benjong amungtsü ao.

Onok aliba Kurini yimti nungi Yirusalem atongtsü lenmang talang. Saka Dawid yimti bushia arudangji ni teyongyaba agi tanitebelem memeteti aru. Yirusalem atongtsü anasaji nisung jenti yimti jagi aruya ni ajuru nung, parnokjia ni ama Kümtettsü Benjong atemaji arur südi ta pelaseta bilem. Yirusalem yimtijji tonger Tsüngrem külemtsü yongyaseta kü mulung nung ken tena, oda Israel chuba Dawidi atenba 'asenoki KIBUBA kidangi odi ta ashidang ni pelaa liasü' ta tena yimtijji tonga aru. Tobur tajung Yirusalem yimtijji kanga prangshia tobur junga angu. Kodang ni yimti tiyongji tonga aru, tetamatsüka kü mulung nung ken atenbato khenyongi tammang agi sünga, ni tatalokba ka angu. Telok tulu kati ola agüja aser sepaitemi lisü amer kar dak areper ama, ano kari süngsü agi azüker ama ni angashi. Ni tonga or telokji nongpoka ia reprangdang nung, nisung asem süng agi yangluba kangki taret kaka apur angu. Nisung ka kangki nung Greek oshi agi Dismas, koba tetezü auür aser kangki ka nungji Greek oshi agi Gesmas temulung meyipba auür ta zülur angu. Par asem rongnung aso tulubai apuba kangkiji tuluba. Iba nisungba atemabo sepai tanishir kati, 'Ibai Yihuda nunger chuba Yisuji' ta zülua amer liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung kiralongrar temi tamanger toku tepset

Abuja, Rongchii/April 04 (Agencies): Fulani shiruru metsürtem aser danga kiralongrar temi taoba ita Plateau state, Nigeria nung pastor ka aser par jabaso ana aser ano danga state tem nunga tamanger trok tepset.

Shiruru metsürtem aser danga kiralongrar temi March 26 aonung 11:00 ako meta North Jos nung Church of Christ in Nations (COCIN) indang ki ka telungi aita Michan Gochin tepset aser par jabaso pua bener ao, ta par jala tamanger kati ashi.

"Nok-nü bena alir temi ozü ki amak, shirnok kiralongrar aser shiruru metsürtem südi ta amanger," ta Beyitmwa Gochin-i Morning Star News dang ashi.

Jos anüolen tsütsü Riyom County nung Fulani shiruru metsürtemi March 5 ayatirm nung COCIN Pastor Musa Hyok aser par jabaso ana Ganawuri jila nung tepset, ta yangji alir Swachet Titus-i ashi.

"March 5 nü Ganawuri nung tejashitsü lendong ka atalok, kong ozü pastor Rev. Musa Hyok aser par jabaso Emmanuel Musa aser Mang Musa nungertem Fulani herdsman aser kiralongrar temi tepset. Parnok ya COCIN tenlaki anasa par kidang lia ayatirm nung tepset," ta lai text message ajanga Morning Star News dang ashi.

Kanke County kübok Kabwir jila nung Hannatu Bawa ya lar kidang nungi February 21 nü pua bener ao, ta yangji alirtemi ashi.

"Khristan tsür Hannatu Bawa ya anepdang 3:00 ako meta pua bener ao," ta Julius

Godiya-o text message ajanga Morning Star News dang ashi.

Fulani herdsman temi Bokkos County kübok Khristanpur timba aliba Maiyanga aser Nabel yimtsüing ya kasa mapang, February 5 aonung 10:00 ako meta maka tamanger pongu tepset aser ana prangbong agi yirutsü, ta yangji alirtemi ashi.

"Yirur alir nisung ana tang mozüki ka nung temang anepaluba mapang lir," ta Marshall Sule-i text message ka nung ashi.

Plateau State Police Command indang odongtar Alfred Alabo-i sangdong ka nung ashiba agi, ketdangsur temi iba lendong bushisüingdanga mapang lir. Jos nung Nigerian Army indang odongtar Capt. Oya James-i ashiba agi, "Bandits tem pua merenshitsü onoki tsüingsü apuba mapang lir."

2022 küm alima nung Khristanpur tamangba yimsü mechi tepsetba ya Nigeria nung timba (5,014) lir, ta Open Doors' 2023 World Watch List (WWL) report ajanga ashir.

Kasa mapang Khristanpur pua bener aoba (4,726), tashiyim amshia shi nung medemba mesüra merenshiba, tashiyim agi kibonga akumba mesüra shi aser tekolok shisatsü nung merenshiba nunga temaba jenjang nung lir, aser tamangba yimsü nung ajemdaker ki aser businesses amakba nunga timtiba lir. Taoba küm tekülem ki amakba aser linük sasep nung tamangertem tesem balala nung prokshiba tsütsüa Nigeria ya jenjang tanabuba nung lir.

2023 küm World Watch List

nung Khristanpur asoshi linük tamajungtiba 50 rongnung Nigeria ya taoba küm jenjang 7 buba nung aliba tang jenjang trok buba nung lir.

"Fulani, Boko Haram, Islamic State West Africa Province (ISWAP) nungi telungpur aser dangar temi Khristanpur amaker, tepseter, tashiyim amshia shi nung medemer, rongsen meshitsü mechi aser alar ama ayutsü asoshi pua bener aor," ta World Watch List ajanga ashik.

"Taküma Khristanpur timba aliba linük south tsütsü azüdokshi angur. Nigeria sorkari tamangba yimsü nung ajemdaker azüdokshia reshikangshiba magizüker, anungji Khristanpur temeden anema inyakba asoshi merenshitsü tetsübo makai inyaker."

Nigeria tesem ajungalen aser Sahel nung Muslim Fulani nung million aika lir aser parnok ya kin balala nungi jakzük aser parnok Islam yimsü taroktiba mamshir saka Fulani kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga tawa sangdong ka nung ashi.

"Parnoki Boko Haram aser ISWAP den sako mapa inyaker aser Khristanpur dak tenük yoker," ta APPG osang ajanga ashir.

Khristanpur litsü-lika agitsü aser Islam yimsü benoktsü tejangraba nung shiruru metsürtemi Nigeria indang Middle Belt nung Khristanpur dak timtem agütsür südi, ta tamanger lenirtemi ashir.

ANO GO ABEN TSÜNGREM DEN

Temerük aser Azükaru (T.Ken 92: 7-15)

Kari nisung taküm nung jenjang asem lir ta ashir : tila tanur mapang, tepenjem mapang aser tain mapang. Asenoki küm nung tain akümba sottsü makok. Saka kecha masü, na kechi koma tain kümdar kümang, asenok Kibuba nung maneni aintsüla. "Süradong ama temeshiba nisung azükarutsü; Lebanon nung cedar ama pa meyiptsü. Kibuba kidang parnok tema lir; ozü Tsüngrem alidak parnok azükarutsü. Dasa mapang nung parnok ano süngjang tangtsütsü; parnok sentsü agi sünga kümyanga alitsü" (t.12-14). Tain akümdang Yisu tsüngdang tagizüktettsü taküm alitsü jangraa alirtem iba o yagi tashi tali itdaksür.

Asenok süradong ama alitsü Tsüngremi asenok dang ashir- Asenoki Khrista dak alitsüla koba tera tanelaren yanga lir. Tambur-tantsür akümdang Tsüngremi ashiba nungi pilar alima dangi meyipa orr temenen inyakba takümüji koda lendong lir!

Ano asenok azükaruba taküm asütsüla. "Parnok tekümyang aser sentzü agi asüngba asütsüla"- Tsüngrem sentsüwangshidaktsüba taküm asütsüla. Süradongi yipru mopung aika tizüka noktakter. Yipru koba tanga süngdongtem sükdangtetter, süradong azüa alur, saka meyipa noktaker. Lisem lima nung tzü bushia süradong tera ali telungi talangka alur. Tangar süngdong arudang süradong tajem alitsü. Aser süradongi maneni süngjang tangtsür. Süngjangji ajema makümer; ibai tajungba akümer.

Tatamsa, asenok Tsüngrem kidang azükarutsü. Kar tain akümdang nemnemshinem tali asür, tetezü obangtsüng tali asür. Asenok iba amaji mesüli. Na tekümyang aser tejang atangba asütsü Kibuba nem agüjang. Telungi aluba tera keta liang. Nai yipru tizüksü aser süngjang tangtsütsü, Kibuba nungi temoatsü anguba agi nai tangar moatsütsü akok.

Tsüngremi na tashi itta indaktsüner, aser tejang atangba süngdong südaktsüner. Na Tsüngrem O nung temer Pa o agi mesüdar ma? Tsüngrem nem sentsüwangshi bener arutsütsüsa süngjang tangtsüdar ma? Tangar moatsüdar ma?

US nung arogo balalai Easter Eggs helicopter ajanga agütsütsü

Rongchii/April 04 (Agencies): United States nung Easter Sunday sentong nung tamanger aika arua adentsü teimla nung arogo balalai helicopter amshia entzü agütsütsü.

The Roys Report ajanga ashiba agi, tesem ajakle arogo tula-tulu ajaki Easter entzü tem anünglen nungi helicopter amshia tsükdaktsütsü sentong yanglua lir.

"Asenok jila aser yimti tulutem nungi mile aika pilar lir. Saka asenoki tulu bilemstü jangrar aser asenok nem nükla tulu agüja aji inyaktsü Tsüngrem dak tamang akar," ta Virginia nung aliba Beaverdam Baptist Church indang pastor Gary Stewart-i ashi.

Beaverdam Baptist Church nungya hopta shia tamanger 250 shi arua Tsüngrem külemer saka kodang arogo züngsem kati helicopter pilot tejen ka jaok, iba mapang arogo iba sentong tulu angati ayongzüktsü lemet.

"Nüburtem pei tanurtem den mapang tajung indoktsü asoshi onoki jaoker. Onok den adenertemi Easter indang tetetzü chichiba angashitsü. kechiaser onoki parnok den

Yisu Khrista indang osang tajung lemsateptsü," ta Stewart-i The Roys Report dang ashi.

Entzü tsükdaktsüba jenjang ya sen \$400 nungi \$800 tsüngta asütsü, ta Platinum Helicopters atema odongtar kati The Roys Report dang ashi. Taküm Easter mapang entsü tsükdaktsüba sentong ter jungnüa nung Platinum Helicopters ajanga shilem agitsü lir.

Ajisüaka aikati entzü tsükdaktsüba sentong yabo arogoi tera tali inyaker asü, ta asüngdang.

"Easter tetetzü chichiba benjongtsü asoshi ibai tim lenmang asü? Asenoki osang temeyoktep agütsür masü na?" ta pastor aser theology professor Jeremy Berg-i blog post ka nung ashi.

Kaket zülur aser Tasen Lai indang professor Scott McKnight-ia iba sentong nung tebilemstü lir, ta ashir.

"Easter tetetzü ya Yisu shia aruba indang lir, takum tasen tenzükba indang lir. Temeshi sentong ka den entzü tsükdaktsüba sentong yagi osangtajung menentsür," ta pai The Roys Report dang ashi.

Linük nung pastor aser

arogotem asoshi Easter ya tongtipang sentong ka lir.

December ita Gallup poll ajanga sayuba nung America nung shilem 24-i tekülem kidangi aotsü mejangrar, saka danga polls temibo küm ka nung Protestant churches atema Easter Sunday nung nisung timba arur, ta sayur.



April 4, 2023 : Philippines yimtiba, Manila nung temeshi hopta mapang tesülen United States aser China indang nisan songer nYisu Khrista timtemba jilushi aiba mapang tanur kati tzü agütsüba noksa nung angur. Roman Catholic nung timba aliba linük nung temeshi hopta tenzükba mapang telok balala adenshia nüburtemi timtem ajuruba indang awareness agütsür.

**AO OSHI ANGAZÜKDAK:
TANÜ ANGAZÜKTSÜBA OJANG**



Poklok

(n) Komo menatepa aoba (infection)

* Tanü asüng wara komo ya **pokloka**-pokloka aoer.

Pokma

(v) ana küma jakma (burst, split)

* Tzüshi **pokmar** tzü ajak yimdok.

OLONG PAITEP # 6478

1			2			3			4
			5		6		7		
8									
			9						
	10								
								11	12
			13			14			
15						16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T _ _ _ lu - (3)
- 10. Takdang temalen - (9)
- 11. Tesa _ _ _ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ ur - (3)
- 4. Kiojen yangludak - (6)
- 6. _ _ _ _ _ aít - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. _ _ _ _ adenshi - (4)
- 14. Tsünüsenbongtsü adokdak - (3)

OLONG PAITEP # 6477 TELANGZÜBA


TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Tajü, 21. Ano, 22. Onü,
- 23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Kamakhya Temple nung nisung taküm tenla agütsüba atema 5 apu



Guwahati, April 4, 2023

(Agencies): June 2019 nung Kamakhya Temple nung nisung taküm tenla agütsüba ken o dak sendakba nung Assam Police Crime Branch-i nisung pungu pua lir.

Iba ya 2019 küm Ambubachi Mela amongtsü lia atalokba liasü. Tang tashi nung iba ken o dak sendakba nung nisung 9 tashi puogo.

Kamakhya Temple nung taküm tenla agütsüba ya tetsür ka ta jangjaogo. La ya train agi tekülem kidangi aru aser la masüdag sarasadema liasü.

"June 19-June 20, 2019 tsüngda Jai Durga Temple step nung tetsür tasümgang ka nung tekolak maket angu" ta Guwahati Commissioner of Police-i ashi.

Iba atema bushisüngdanga aodang Guwahati Police-i tasür indang osang kecha mengutet ajisüaka nisung tepsetba ken o

ka benok.

Iba tasümgang social media nung belenshiba sülen West Bengal Hooghly district nungi Suresh Shaw ta ser nisung kati July 28, 2019 nü Guwahati-i aru aser pa tetsü Shanti Shaw Ambubachi Mela nung adentsü atema aoba sülen kidangi maru ta ashi.

Iba ajanga tasür indang maitsü jangjateta liasü ajisüaka police-i la tepsetertem mengutet.

Ibala ken o atema Assam police-i special team ka tentet aser parnoki Cooch Bihar nung oa Kailash Barmam'er ki mita aodang Shanti Shaw indang juli den la indang Aadhar card aser Guwahati-i aoba train ticket angu.

"Pa dang asüngdangya asüdag Mata Prasad Pandey (Mateshwar Giri) ta ser Sadhu ka par kidang anenzük aser pai item osettem yutsür ao ta ashi.

Iba osang angazüker Assam police-i Jabalpur nung oa tekülem ki ka nung Sadhu ji apu" ta Commissioner of Police-isa metetdaksü.

Mata Prasad Pandey-i ashiba nung ajemdaker Assam police-isa Suresh Paswan, Kanu Tantrik, Raju Baba (Bhiaya Ram Mauriya) aser Pradeep Pathak nung apu.

Iba tasa ajunga ya Pradeep Pathak (52)-i atong aser pa ya Varanasi, Marthuri nung alir ta Sadhu-i jungkai adoka ashi.

Iba tatalokba atema temulung meleme bilemertem ya West Bengal nung alirtem ta bilemer aser parok June 2019 nung aruba sülen künü mongzüker tasüngji meyipa oadok.

Kamakhya Temple ya India nung akhümtsübuba tekülem ki ka lir aser kümshia Ambubachi festival nung temeshi aini aoer aika arua shilem agir.

BPF-i 2024 Lok Sabha election nung kija dang tokteptsü

Guwahati, April 4, 2023

(Agencies): Assam nung 2024 Lok Sabha election kija dang tokteptsü ta Bodoland People's Front (BPF) chairman Hagrama Mohilary-i ashi.

2024 election nung BPF-i teloktep kecha nunga madentsü, ta chairman Mohilary-isa ashi.

BPF-i Kokrajhar aser Mangaldoi menden ana nung tokteptsü ta paisa ashi.

BTR region nung tensa süngjema yimjung nung alitsü atema pai maneni peace rally alitsü ta Mohilary-isa shisem.

"UPPL-i nisungtem peace rally nung madentsü atema

noktangtsü merangba osang lir saka nübertemi aden kechiyong UPPL-i BTC raksatsüba nübertemi meteta lir" ta paisa metetdaksü.

Assam nung Lok Sabha menden 14 lir aser iba nungi BPF-i Kokrajhar o Mangaldai nung tenük yoker.

Ukhrul nung College bus ka tsükok; Nisung 14 yiru



Imphal, April 4, 2023

(Agencies): Ukhrul Pettigrew College kaketshirtem amenba bus gari ka Mongulbarnep Ukhrul nung lendong atalokdang nisung 14 yiru.

Tanep 10:30 ako meta

Khararphung, Hunphun nung lendong atalok. Bus gari indang brake mapa meinyaki akümba ajanga lenmang nung mekupok.

Iba lendong nung yirurtem ajak anameta aliba Leishiphung Christian Hospital-i anir oa

anepalua liasü.

Iba bus nung handyman kanga mejungi yiruba agi Imphal nung anir aoa anepaludar.

Bus tsükokba sülen 35 Assam Rifles-i recovery van ka yoka bus ji atsütet ta osang ajanga ashi.

**OFFICE OF THE
DIMAPUR ASETKONG TELONGJEM**
DIMAPUR - 797 112 : NAGALAND
Nukjidoeng : "Telongjem Asoshi"



Wabong T. N Mannen



Wabong Moatoshi Longkumer

KONANG TETUSHI AGÜTSÜR

Ozü lenir ana, Wabong T. N Mannen IAS (Retd), advisor Law and Justice and Land Revenue aser Wabong Moatoshi Longkumer, Advisor, Labour, Employment & Skill Development and Excise 14 buba Nagaland Legislative Assembly Election nung 23 Impur Assembly Constituency aser 2 Dimapur-II Assembly Constituency nungi takok anguba atema Dimapur Asetkong Telongjemi konang agüja tushir. Nüburtem tenzüksü atema teyanglur Tsüngremi tena nem arishi talang aser shisatsü tajung moajang ta sarasadema atar.

Sd/-
S. Imli Jamir
President
Dimapur Asetkong Telongjem

Sd/-
Tinuwangshi Jamir
G/Secretary
Dimapur Asetkong Telongjem

MULUNGEN O

ASO :
05/09/1924



ASÜ :
31/03/2023

Temeim ojala asür **Noksenyangla** (Longkong) jala jabaso 6, semchir 28 aser temeibatam den Teyangluri moatsüba arishi küm 99 tashi alitsüsa moatsüba nung onoki la taküm asoshi Tsüngrem nem tenüngsang agütsür. La anema alidang nungi akümüli tembang nü tashi temeim adianutem, senso tajungtem aser tembartem shirnokisa tamang sarasadem, shisatsü tajung aser rongsen jenti agi yariogo, ozüi nenok shia dangi arua meshiteter, saka iba osang kakat ajanga pelaba mulungen o lemsateper. Tanü temeim ojala alishi nung onok nungi pilaa oadokogo, saka ibai "ken asoshi amoi aoba dang" iba teimla nung onoki la tanaben ajurutsü yimlar.

**Temeim Chirnurtem, Semchirtem,
Anükapang aser Kinungertem.**

Pakistan Supreme Court-i Punjab election May 14 nü agitsü tuyu Islamabad, Rongchii/April 4 (Agencies): Pakistan Election Commission-i province ana nung assembly elections agitsü menomeyangdaksüba ya temzüng ozüng anema ta Supreme Court-i sangdongogo. SC-i Mongolbarnü sorkar dang Punjab province nung May 14 nü election agitsü atema tetuyuba agütsüogo.

Taoba Ato Kilonser Imran Khan-i aniba party Pakistan Tehreek-e-Insaf (PTI)-i okadak temepeshiba ka benokba sülen SC-i iba tetuyuba agütsüogo. Rongsenketzüng nung tetsüidaksü lir ta shia sorkari election agitsü atema senotsü agütsütsü memulungba sülen Election Commission of Pakistan's (ECP)-i Punjab nung election April 30 nü agitsü aliba October 8-i belener tutsüba atema Khan'er party-i ken o benoka liasü.

National election takaratiba nung agidaksütsü atema nongshitsü asoshi PTI-i January ita Punjab aser Khyber Pakhtunkhwa provincial assemblies loksatsü atema telemtetba agia liasü. Küm ka tejakdang PM mapa nungi aginba sülen Khan-i elction takaratiba nung agitsü khanga arudar. Pakistan nung yimya agi national aser provincial elections külemi dang agia arudar. Ajisüaka legislative assembly ka

loksaba sülen anogo 90 tsüingda election ayongzüka agitsü atema temzüng ozüng nung shia lir. ECP-i election agitsüba anogo sangdongtsü memulungba sülen Supreme Court-i February ita telemtetba ka agia ECP dang province ana nung ya election agitsü asoshi anogo sangdongtsü tetuyuba agüja liasü.

Taoba ita ECP Punjab elections April 30 nü agitsü ta sangdonga liasü. Ajisüaka March 22 nü ano anogo melenshir October 8 nü election agitsü ta sangdong aser ibayongji PTI-i SC nung ken o benoktsüsa aküm.

Supreme Court-i ashiba agi, Punjab election agitsüba anogo mesangdongba ya ECP-i parnok nem agüja aliba tashi alia amshiba lir. "Elections agitsüba anogo atsülangtsü asoshi constitution-i Election Commission of Pakistan nem tashi agüja mali," ta SC-i ashi. Khyber Pakhtunkhwa province nung election agitsüba dak sendakba nung SC-i, forum tapet ka nung ken o benoktsüla, ta ashi.

Okadak ajangsa, election atema April 10 nü tashi nung sen billion 20 agütsütsü sorkar nem tetuyuba agütsüogo aser ECP dang April 11 nü sen angu mangu iba indang osang agütsütsü metetdaksüogo. Judiciary aser sorkar na

atsütepba aliba mapang ka nung SC-i iba obendang agütsüogo. Sorkari taoba hopta Supreme Court indang chief justice tashi ajemtsütsü atema ozüng tasen ka benoka liasü.

Sorkar tenzükertemi aikati SC-i obendang agütsüba ashishia aruogo aser obendanger anati mapa toktsüba sülen obendanger aseme kümtetba bench kati PTI-i benokba ken o angadangba dak tamang makatetba lemsatepogo.

Sorkari Supreme Court obendanger ajak abensa lia iba ken o angadangtsü atema takhangba agütsüogo, ajisüaka SC-i iba takhangba ya Hombarnü magizüki liasü.

Iba dak sendakba nung Foreign Minister Bilawal Bhutto-Zardari-i ashiba agi, SC-i bench tuluba ka mekümtetra linük nung mepetmesü tulu adoktsü akok. "Bench tuluba ka mekümtetra linük nung martial law mesüra emergency mesükba inyakyim ka benoktsü ta shisabulua bilemer," ta pai ashi.

Chief Justice Umar Ata Bandial ateshia jembiba mapang Bhutto-Zardari-i, "Okadak aser nü kübok inyakba obendangerntemi nü dak tamang makatetra aser iba amala ken o tasak benoka aliba mapang na sentokra bench tuluba ka kümtettsü nungdaker," ta ashi.

**OFFICE OF THE
MONGSENYIMTI LAISHIR TELONGJEM**
P.O: Chuchuyimlang, Mokochung, Nagaland

TENÜNGSANG AGÜTSÜR

Tsüngremer Tajaba kanga aroka metetba aser Pa Yimli nung sannüker asütsü taküm mapang aser kibong rangpen bendanga agüja tenzüksü nangzüktetba Tsüngremlar Rev.Dr. Aowapang Ozüküm asür Imkongramok aser Tzüwainla na jabaso tambusang Guwahati Ao Baptist Arogo nung sannüker mapa inyaka lia, ano lai o tali tarokba anagettsü meranga zünga Pai ACTS Academy of Higher Education, Bangalore nungi Dissertation Title: **"The role of the Church and the State in Preserving and Promoting the Endangered Ao Language: An Appraisal"** nung zülua Doctorate of Ministry (D.Mn) renema Mongsenyimti Laishir Telongjem nem konang nüngsang tulu bentsür aruba tepela tulu asoshi pa nem tenüngsang tetushi agütsür. Tsüngrem o bushiba nung temaba jenjang tongtetba ajanga ano Pa tenzükba mapa nunga takok tulu ngua inyaktettsü asen Laishirtemi yongyaseta sarasademtsür. Tajung Tsüngremi na aser nur kibong Pa tenzükba mapa asoshi tali moajangma.



Sd/-
W. Likoknungsang Ozüküm
President, MLT

Sd/-
Wb. S. Kümzük Lemtur
Gen. Secretary, MLT



Bangladesh yimtiba, Dhaka nung jenjang talangba agi aben-süoshi angudak nungtugu market ka nung mi adokba sülen yangji alirtemi firefighter tem den yaritepa mi remseptsü meranger. Dhaka kübok Bangabazar Market nung Mongulbarnü mi adoka liasü, saka asü-amaba osangbo mali.

Pakistan-i China dang sentsüh aotsü mapang apuloktsü Islamabad, Rongchii/April 4 (Agencies): Taoba hopta indang asüngdangba nung Beijing sorkar mesüra Chinese central bank ajanga telangzüba agüja mali.

Sen menoktsü mapang tonger ano mapang apuloktsüba osang Dar-i sangdongba ya mezüngbuba alitsü. Dar-i anogo apuloktsüba indang 'maturity date' tasenba mesüra iba atema danga inyakyim indangbo mashi.

Maparen tembangba sülen osang ka sangdongtsü, ta finance ministry ketdangsür kati Bodhbarnü shia liasü.

2019 küm züngzüktepba \$6.5 billion bailout package nungi sen billion \$1.1 salatsü atema Islamabad-i IMF den February ita tetenzüklen nungi jembia arua liasü.

Tang tashinung Islamabad yariba linükji mapang talangka nungi par tembar Beijing ya dang lir, aser parnokitaoba ita Pakistan indang central bank nem sen billion \$1.8 agüja liasü.

Sen apua aliba menoktsü asoshi mapang apuloktsüba ya Pakistan atema kanga tongtipang lir, kong reserve nung sen aliba ya bendanglen nungi osettsüset hopta pezü atema dang bener arushi anünga lir aser IMF den sen billion \$1.1 meshizüksü jembishinüba terenlok makai anendaka lir.

"March 23 nü iba sentsüh menoktsü mapang apuloktsüogo ta pelashishia metetdaksür," ta Dar-i parliament nung iba sentsüh menoktsü anogo athishia ashi. Iba dak sendakba maparen ajak renemogo, ta pai ashi.

Iba sentsüh menoktsü

1buba Aoleng badminton asayamung tembangogo



Dimapur, Rongchii/April 4 (TYO): April 3 nü Badminton Stadium, Mon nung 1buba Aoleang Open Badminton Tournament shibangba sentong nung MLA, Y. Mankhao Konyak alakteta jaoker liasü.

Iba badminton asayamung ya Mon District Badminton Association aser Officers' Club Mon na longjemer ayongzüka liasü.

Asayamung shibangba sentong nung Y. Mankhao Konyak-i asayartem dang takok aser tamakok naprongla ya asaya nung shilem ka lir ta ashiba den asaya nung shilem agibaji kanga tongtibang ta ashi.

Paisa, state nung saisapong ajungkettsü atema sorkari jenjang agibatem indang kar lemsatepa liasü. Pai meranga inyakba ajanga dang nisung kati

pei nükjidong tongtettsü, ta shia asayartem ajungshi.

MLA, C. Manpon Konyak shiba iba sentong nung dena liasü paia asayartem ajungshi aser ashiba agi, saisapong ya taküm nung shilem ka dang masü saka iba ajanga nisung ka taküm peridaktür.

Sentong nungsa Konyak Union tir Tingtok-i asayartem ajungshi aser team balala dang yimya tajung bentshia asayatsü ajungshi. Paisa, District nung amenoka aliba officer tem nüburtem den külemi asaya tembar ayimba ngua kanga pelaba lemsatep. Paisa, Mon terenlok aser yimjung asoshi NGO aser nüburtem dang teka amteper inyaktü ayongzü.

Kasa mapang nung Superintendent of Police Mon, Uniel Kichuin-i lokti pela

agizükba o jembiba mapang, iba asayamung nung asayar 70-i shilem agi aser asayartem rongnung tanobusangji arishi küm 8 aser tanbusangji küm 60 liasü ta metetdaktü. Iba sentong ya Yaom lenisüba nung agi aser VP MDBA, Nyamphong-i tepela o jembiba liasü.

Asaya nung takok angurtem:

1. Under 15 girls Winner : Angel, Runner up : Anon.
2. Under 15 Boys Winner : Nokpon, Runner up : Rehan
3. Mixed Double Winner : Ponlih and Shemon, Runner up : Yaom and Rokozo
4. Men's Double Winner : Abo and Yatsak, Runner up : Shemon and Rokozo
5. Veteran Winner : Winsha and Homann, Runner up : Y. Pongba and S. Imitemjen Ao.

Monte Carlo Masters: Nadal aser Alcaraz na masayatsü

Rongchii/April 4, 2023 (Agencies): Taruba hopta nung tenzüka asayatsü aliba Monte Carlo Masters nung Rafa Nadal masayatetsü, kechiyong pa yiruba tang tashi taneptsü junga monguteti lir, ta pai Mongolbarnü metetdaktü. Kasa mapang nung world number two asayar Carlos Alcaraz-a iba asayamung nung masayatetsüsa kümogo.

Nadal taoba ita Indian Wells nung Masters 1000 event nung shilem magitet aser taoba hopta asayaba Miami Open nunga masayatet, kechiyong pa January ita Australian Open tanabuba round asayaba mapang tetsung nung timtem adokba tang tashi taneptsü kanga junga monguteti lir.

"Tia maka ni tokteptsü atema renema mali aser ni kanga asayanüba asayamung

ka nung masayatetsü," ta Nadal-i ashi.

"Kü indang career nung Monte Carlo ya kanga tongtibang asayamung ka lir, ajisüaka tia maka ni masayatetsüsa akümstü kechiyong ni tokteptsü atema renema mali aser yirushitsü akok. Ni tanaben meyipa arua asayatsü atema renemshitsü," ta paisa ashi.

Asayamung kar nung shilem magitetba sülen Nadal ATP rankings nung jenjang 13bubai asepsüka luogo aser hopta 912 top 10 nung aliba tembangogo.

Spain nung asayar shibai pa indang career nung Monte Carlo asayamung 11 ben koka lir, pa May ita asayatsü aliba French Open atemabo renemer alitsü imlar. French Open ya pai amokbanger asayar arudar aser pai iba asayamung 14ben koka lir.

Kasa mapang nung Alcaraz shiba taküm yiruba ajanga mapangshia timtema arudar, pa-iba asayamung nung shilem magitettsü. Arishi küm 19 tain asayar ya tatesa taoba Hopta Miami Open nung asayaogo, kong pa semifinals nung Italy nung asayar Jannik Sinner-i tsükdakja liasü.

"Ita ana tokteptsü sülen ni kidangi meyipa arutetba atema pelar saka Miami nung semifinal asaya temang nung minpronga tembangba atema mepelar," ta pai ashi.

"Tanü doctor ajuruba sülen ni clay court tour tenzüksü atema Monte Carlo-i motettsüsa kümogo.

"Ni teka tabelenlen post-traumatic arthritis lir aser tongtoret nung tetsü nung minprong ka lir koba taneptsü angutsü atema anisungzüksü nungdaker," ta pai ashi.

World Masters Athletics Indoor Championships 2023 gold medallist athlete, arishi küm 95 Bhagwani Devi Dagar New Delhi, IGI Airport nung agizüba noksa nung angur. Dagar-i Torun, Poland nung asayaba asayamung nung Discuss Throw nung gold medal asem ngua liasü.



Sanjita Chanu nem küm 4 atema tenokdangba agütsü

Rongchii/April 4, 2023 (Agencies): Commonwealth Games nung anaben tashi takok ngur aliba India tsür weightlifter Sanjita Chanu nem National Anti Doping Agency (NADA)-i küm pezü atema tenokdangba agütsüogo. Taoba küm dope test majangtetba sülen la nem iba tenokdangba agüja liasü.

Taoba küm September-October ita Gujarat nung National Games asayaba mapang tendangdang Sanjita-i anabolic steroid - Drostanolone Metabolite amshiba puteta liasü, koba World Anti-doping Agency's (WADA) prohibited list nung züngoksema lir.

Indian Weightlifting Federation (IWF) tir Sahdev Yadav-i iba osang jangjashitsüogo.

"Hau la nem NADA-i küm pezü tenokdangba agütsüogo," ta pai PTI dang ashi.

Iba ya Sanjita atema takoksa tulu asütsü aser lai tenokdangba agütsür aliba mozü amshiba potetba sülen la ket nungi National Games silver medal agütsü.

Sanjita 2014 küm Glasgow nung Commonwealth Games asayaba mapang 48kg category nung Mirabai Chanu dang nungi tajungba asayateta gold medal angu.

Manipur tsür la ket nung iba telemtetba atema temepeshiba ka agütsütsü lenmang lir. Ajisüaka lai ken o benoktsü mebenoktsü mejangja.

"Ni iba ya ajangshiatokogo aser kechiba ni tenokdangba agütsür aliba mozü amshia tanaben iba inyakyim nung shilem aginütsü. Ni temepeshiba ka agütsütsü magütsütsü mejangja. Mepeshiyonga memepeshiyonga ni akoksatsü.

"Ni mepeshira ken o agütsütsü atema mapang agütsü aser ni Olympics aser Asian Games atema qualify asütsü asoshi maongka makai akümstü. Ni memepesira tenokdangba agütsütsü," ta lai January ita PTI dang ashi.

2011 Asian Championship bronze medalist ya iba ken o nung tang mezüngbuba asonger masü.

2017 küm Nobvember ita US nung World Championships masaya tsüngda lai anabolic steroid testosterone amshiba putetba sülen 2018 küm International Weightlifting Federation (IWF)-i la nem tenokdangba agüja liasü.

Ajisüaka 2020 küm IWF-i tenokdangba agütsür aliba agütsü, kechiyong Sanjita indang sample amshiba yimya mejangjai liasü.

"Ni iba tia ya ajangshidangogo, saka ya kodaser atalok aji ni memetet. Iba tatalokba sülen ni kanga kümdanga chijema aruogo. Ni kü indang supplements tem kanga junga asadanger aser item ya achitsü tapet asü masü asüngdangrang achir," ta lai ashi.

Brazil nung Volleyball asayar Wallace nem tenokdangba agütsü

Rongchii/April 4, 2023 (Agencies): Online ajanga tir Luiz Inácio Lula da Silva mezüngmeshiba atema Brazil indang Olympic Committee-i Hombarnü Olympic volleyball gold medalist Wallace de Souza küm ka atema tenokdangba agütsüogo.

Committee ethics council nung züngsemtem ajaki de Souza küm ka asaya nung shilem magidaktütsü atema mulungtepa agizükogo, kechiyong pai social media nung mepetmesü adokdaktütsüsa jenjang agia liasü.

Pa January 31 nungi club inyakyim nung shilem magidaktütsü atema tenokdangba agütsür liasü. Lula tejak nung akhatsü atema langa ali mali ta asüngdanga pai social media poll ka tenzüka sülen pa nem tenokdangba agüja liasü. De Souza ya taoba tir Jair Bolsonaro pusemer ka lir, shiba

far-right lenir ka aser pro-gun activist ka lir.

Lula-i October ita election nung Bolsonaro tsükdaktü aser January 1 nü nungi mapa agizüka inyaka arudar. Taoba mapang 2003 nungi 10 tashi pai tir mapa benogo.

Olympic committee-isa, de Souza anogo 90 national tetokteptsü nung shilem magitsü atema tenokdangba agütsüogo aser iba ajanga pa Brazil indang top-flight volleyball league knockout stages nung masayatetsüsa kümogo. Pa Cruzeiro nungi asayar aser Brazilian Superleague title abentsü imlaba club tem rongnung Cruzeiro-a ka lir.

2016 küm Rio de Janeiro nung Olympics asayaba mapang Brazil-i gold medal anguba nung De Souza-i teyari tulu agüja liasü, ajisüaka pa international asaya nungibo anenatokogo.

BILEMDANGANG

"Tetsübu agi nisung ka kümdangshidaktür."